









道

藏



第一册

道藏

李一氓



文物出版社
上海书店
天津古籍出版社

歷代崇道記

推一

穆王於崑崙山王屋山嵩山華山泰山衡山恒山終南山會稽山青城山天台山羅浮山崆峒山致王母觀前後度道士五千餘人秦始皇帝併吞六國招方士好長生之術遣使往蓬萊採不死藥造宮觀一百餘所度道士一千七百餘人漢文帝實太后並好黃老之術造宮觀七十二所勅天下如不通黃老經者不得注官又親訪河上公問道德之要天下大治計度道士一千餘人孝武帝奉道彌篤感王母降於宮中遣帝白銀像五軀曰是太上老君之真形也帝別營三殿而供養之後移像於柏梁臺上後又移於甘泉宮內以一殿而並列之南向設座自茲始也又度公主數人及度道士約五千餘人并造觀三百餘所其嵩嶽萬歲觀泰山登封觀華山集仙觀終南望靈觀王屋通天觀並不得令庶姓居之以爲恒式其萬歲觀因帝巡幸而聞山呼遂捨行宮而爲觀焉至孝宣帝時有上黨郡功曹李憚因入抱犢山採藥於石室內獲

天書四十餘卷并玉箱玉枝獻於河東郡太守張純純立遣使上進帝視之大驚不覺流涕乃令宣示內外臣僚時毋奏爲主書中郎將見之泣曰此是武帝臨崩時遺制令葬於梓宮之內何由至此及披之卷後所有臣僚校勘姓名于今見有存者帝乃遣使檢校茂陵即又安完如故帝乃爲武帝造觀二所一在長安城內一在茂陵之下以奉先帝也復度道士二十人以奉香火也後赤眉之亂茂陵爲賊所發於梓宮之中但見有劍一口方欲取之其劍忽然哮吼騰空而去世祖光武皇帝既平王莽天下大定東封禮畢乃爲本朝十一帝追薦及南陽春陵名山大川長安洛陽計造觀一百二十所度道士一千八百人魏明帝爲武帝及先太后造觀於五都計一十三所度道士一百九人仍詔道書同御史裝飾吳主孫權於天台山造桐柏觀命葛玄居之於富春造崇福觀以奉親也建業造興國觀茅山造景陽觀都造觀三十九所度道士八百人晉武帝於洛陽造通天洞天靈

仙靈寶四觀及諸州共二百所先魏末隴右臨洮郡有神人長三大著白衣垂素髮戴金冠現於襄武縣告縣人王始曰不久當見太平及武帝受禪果天下一統帝乃令於所現處造告平觀即李宗之故居也別度道士七人并前後所度道士共計四百七十二人時吳郡臨平湖岸崩獲石鼓一枚遣使上進帝問司空張華此物何用曰但以桐木刻作鯨魚形扣之必有聲聞於數里至惠帝時於宮中忽夜鳴不已帝甚惡之乃遣嵩山萬歲觀擊之集衆自茲始也後魏道武帝於雲中太原及河朔造觀計五十所度道士六百餘人太武帝令天下造太平觀共二百七十五所度道士一千三百人帝受錄改太平眞君元年仍令四方內外上書言太平眞君皇帝陛下自後帝嗣位並皆受錄後周武帝於長安造通玄館以延羽客隋高祖文皇帝遷都於龍首原號大興城乃於都下畿內造觀三十六所名曰玄壇度道士二十人煬帝遷都洛陽復於城內及畿甸造觀二十四所度道士

一千一百人皇朝高祖神堯大聖大光孝皇帝於隋末大業十三年感霍山神稱奉太上老君命告唐公汝當來必得天下至武德元年晉州浮山縣羊角山著素衣戴金冠乘朱駿白馬令吉善行告神堯汝今得聖理可於長安城東致一安化宮而安道像則杜稷延長天下大定善行辭見天子何以爲據太上曰但去有獻石龜者可以爲信善行乃告晉州刺史賀君孝義遂將善行見秦王具言神人現事群官拜慶遂差左親衛帥杜昂與善行於所現處設祭太上又現一如善行所言以鞭指昂曰汝是何人昂曰是秦王使者太上曰我不飲不食何用祭乎所有委曲令人具知昂還乃言神人復現秦王大悅乃令昂將善行入京上奏至京立未定果有邱州治中張達獻石龜上有文曰天下安子孫興千萬歲千萬葉遂入面奏高祖大悅詔授善行爲朝散大夫賜物一百段乃令通事舍人柳憲於羊角山立廟復改浮山縣爲神山縣羊角山爲龍角山太上又現爲善行曰天

子喜歡否對曰大喜又曰疑惑何事復對曰爲不知聖者姓名耳太上曰我是無上神仙姓李氏號老君即我也我即帝之祖也史記中有傳亳州谷陽縣本廟有枯樹再生爲驗我已令周公旦領神兵助國家打劉黑闥得四月節即破矣孝義又令善行入奏高祖乃勅善行馳驛往洛陽軍所宣勅示諭至時果平黑闥四海大定枯樹亦重生焉乃改廟爲慶唐觀今觀內有明皇御製書碑及列聖真容並在武德三年詔晉陽道士王遠知授朝散大夫并賜縷金冠子紫絲霞帔以預言高祖受命之徵也太宗又加遠知銀青光祿大夫並遠知預言之故也羽衣人賜紫衣自茲始也高宗龍朔二年詔洛州長史譙國公許力士於邱山建上清宮以鎮鬼仙洞掘得古石按即仙人帛仲理之故基也及功畢帝令設醮太上又現百官進表稱賀帝大悅乾封初帝東封禮畢迴鑾亳州親謁太上謹上尊號爲混元皇帝聖母爲先天太后仍改谷陽縣爲真源縣又爲太宗文德皇后造東明

觀於京師又勅道士宜祿宗正寺仍立佐在親王之次文明元帝天后欲王諸武太上乃現于魏州開鄉縣龍臺鄉方輿里皇天原遣鄔玄崇令傳言於天后云國家祚永而享太平不宜有所偕也天后遂寢乃捨闕鄉行宮爲奉仙觀後慶山湧出於新豐縣界高三百尺上有五色雲氣下有神池數頃中有白鶴鸞鳳四面復有麒麟獅子天后令置慶山縣其諸祥瑞具載天后實錄以表國家土德中興之兆也又捨中嶽奉天宮爲嵩陽觀以追薦高宗大帝也竟傳位於中宗孝和皇帝景龍元年勅天下州郡並令置景龍觀二年改爲中興觀三年改爲龍興觀其度人一依前代故事睿宗捨東京宅爲景雲觀又捨太原宅爲唐隆觀爲資薦天皇天后也明皇開元中勅諸道並令置開元觀又製混元讚帝親書勅之于石又勅五嶽置真君廟又勅上都置太清宮東都置太微宮以太原神堯舊宅爲紫微宮洛州洛龍故宅爲啓聖宮並給袞冕絳紗帷帳交龍門戟一如宮闕之制帝又

注道德經及製序引詔天下士庶並令家藏一本兩街道衆乃以幢幡伎樂自禁中迎引歸于太清宮看花之盛近古未有又勅置道舉一如禮部之制帝親自策之達者甚衆後蒲州奏因修紫極宮掘地獲玉石狀如半月復有仙人杵藥之像扣之有聲頗甚清遠帝令懸於太原玄元廟旋號之爲偃月聲東都留守張琦奏汝州魯山縣因修仙居古觀獲玉瑛扣之聲聞數里帝令懸於太清宮聖祖廟庭衡州爲建觀宇穿地得魚一頭長三尺其狀似鐵微帶紫碧之色又如青石先瑩雕鐫殆非人工所成也扣之甚響其魚亦不能名遣使來獻帝令宣示百僚亦不能辨帝乃呼爲瑞魚馨仍命懸於太微宮非講經設齋不得擊之由是諸觀競以木石模之以代集衆又詔諸官悉以宰臣及本道節度使領之未爲常式帝又製霓裳羽衣曲紫微八卦舞以薦獻於太清宮貴有異於九廟也帝東封獲江淮間三脊茅乃令於所獲之地置靈茅觀乃禮畢迴謁聖祖於亳州本宮親札道

德經於石作大幢造八角樓覆之於虛元殿之前又幸懷州開元觀及閭鄉奉仙觀爲王公萬民所請亦親札二經以大石對峙立之一如太清之製乃詔授鄆玄崇爲號州刺史開元十七年夏四月五日益州大都督府長史張敬忠奏大聖祖混元皇帝應現於當管蜀州新津縣津興尼寺佛殿柱上自然隱起本文爲太上老君聖像當頂上有華蓋足下前後各有雲葉天花共一十三處謹差判官益州功曹參軍王大鎮檢覆得狀與本州刺史李忠徇別駕盧昉縣令李韶道士僧尼一百三十人狀同方敢上奏至五月二十四日勅差內侍林昭隱宣取像柱入京於大同殿供奉又令兩街官觀各賜供養七日却令進入大內于今見在前後瑞應極多難以具錄二十九年正月七日陳王府參軍田同秀於丹鳳門外忽見紫雲自西北映樓又見混元乘白馬侍從二童子二童子謂同秀曰我昔與尹喜將入流沙之日藏一匱靈符在桃林故關尹喜舊宅汝可請帝取之同秀具事聞

奏勅差內使李志忠監同秀往陝州桃林縣南十二里故函谷關墟求訪之俄有紫雲白兔現於枯桑之下便乃穿掘下至水際得石函金匱玉板朱書細篆帝聞奏大悅即令京師列十部樂歌舞鼓吹自通化門入其文於寶輿中五色放光洞照天地帝於丹鳳樓上身披龍袞手執金鑑六宮嬪嫔競於樓上焚香散花遙自作禮帝又令亂撒金錢於樓下縱令士庶分取以爲歡樂斯須山呼之聲震動京邑帝令置寶符於靈昌殿是夜樓閣林樹之上皆有神燈乃於正月一日改開元三十年爲天寶元年改桃林縣爲靈寶縣其後三年帝見靈符有天寶千載之字天寶已應改元之號遂改年爲載乃於其地長樂亭置天寶觀御製并書靈符銘立於所獲之處又於大內置靈符殿賜同秀五品正員官宰相請加尊號爲開元天寶神武之字制可之乃大赦天下其年閏四月帝夢混元謂帝曰我在城之西南久矣當與汝於興慶相見可遠迎我帝謂宰相李林甫牛仙客曰朕臨御海

內向三十年未嘗不五更而起具朝服禮謁具容爲蒼生祈福近因假寐見混元具言上事遂差內使與道門威儀蕭玄裕於城西南尋訪數日忽於樓觀山谷間見有紫雲現白光爲天於其下穿之果得玉像老君高三尺餘以進其日帝在興慶宮大同殿親自迎謁果符興慶之言置於內殿供養仍令所司寫真容分送天下諸道宮觀遂大赦天下五載帝夢見混元言我有靈應尋當自至遂於太白山獲靈符玉冊及迎到京置于靈符殿親自供養仍封太白山神爲靈應公改獲符洞爲嘉祥洞於山下置具符縣乃令諸道置真符觀仍編入史其年十二月帝幸華清宮其月四日日出時忽見驪山頂雲物積異須臾雲散見混元聖祖現於朝元閣上帝與內人瞻謁良久乃隱詔改會昌縣爲昭應縣其新豐縣隸入昭應又封會昌山爲昭應山封山神爲玄德公改朝元閣爲降聖閣內出圖本頒示天下宣付史官八載帝獲二十七仙玉像於寧州羅川縣勅令迎像入京一如天

寶初迎靈寶符儀注故事帝親自製譜尋改羅川縣爲真寧縣於所獲處造通聖觀帝製碑文立之于今並在其年六月大同殿產玉芝一莖又造金仙玉芝二觀復度公主二人爲道士又太白山人李渾上言見混元言金星洞內有玉版石記聖皇福壽之符勅御史中丞王鉷入遊谷行四百餘里求而得之勅以殊祥頒示中外乃於其地造靈符觀閏六月丙寅帝謁太清宮加五聖尊號作仲尼四子像侍立於混元之前又勅十道大郡置玉芝觀大赦天下九載太白山人王玄翼上言混元大帝降現言寶仙洞中有妙寶真符謂帝取之勅刑部尚書張均工部尚書王倕往取獲之乃造真靈觀十三載正月帝謁太清宮又上混元尊號爲大聖祖高上大道金闕混元天皇大帝五聖各加謚號帝加開元天地大寶聖文神武證道孝德皇帝大赦天下十五載帝幸蜀混元現於漢中郡三泉縣黑水之側帝親禮謁遂命刻石像真容於所現之處又於利州益昌縣山嶺上見混元騎白

衛而過示收棟山之兆詔封其山爲白衛嶺於所現之處置自然觀又於嵩山置興唐觀成都置福唐觀肅宗至德二載三月十八日混元現於通化郡雲龍巖初因郡人爲國祈福建大齋會十八日忽煙霧異香氣不散至辰時漸開霽神光照天因見混元真像立於山前自地接天通身白衣左手垂右手執五明之扇儀相炳然衆瞻禮其山雖高亦不及肘良久乃隱遂具上奏內出圖本太上皇製謚并序文繁不錄具編史冊仍示天下乾元二年帝夜夢二青童導從至一宮闕謁見混元混元衣雲霞之衣冠九鳳之冠坐方席垂寶蓋凭玉几執白拂左右侍衛真人玉女神仙童子五天力士羅列極衆帝著絳衣秉圭立侍於混元之後遊涉山海經歷甚速帝一一潛記又見混元鬚髮皆黑及明宣下兩街訪諸瑞像於務本坊光天觀聖祖院果獲黑髭老君之像圖寫以進帝見大悅一如夢中所想乃出帝真容令侍立於混元之後仍頒示於天下普令供養代宗初於楚

州安宜縣獲八寶因改安宜縣為寶應縣勅於所獲處造寶應觀遂改元為寶應元年大赦天下德宗貞元十年混元潛使金母累降於果州金泉山授鍊炁之術付女真謝自然修習功成以其年十月十六日白日上昇後

三月乃歸謂刺史李堅曰天上有玉堂最高老君居焉壁上皆題神仙之名時注脚下云在人間或為帝王或為宰輔神仙入謁老君皆四拜焉自然言訖遂却昇天敬宗寶曆二年正月帝有事于南郊朝獻太清宮御駕將至長安縣主簿鄭翦忽見老君衣白衣容狀異常謂翦曰當此路有井可遠實之不然禍在不測翦驚惶顧其地已微陷遂併力實之因失老君所在駕至具以上聞百官稱賀詔兵部侍郎韋處厚為碑起居郎柳公權書立子實并之側乃編付史官其年十二月十八日柳公權書碑之際忽有勁風颯然而起旋颯不已乃見混元著紫衣金冠金履立於白蓮花之上右手執五明扇左手垂下空中光明如金色公權與鑄碑人瞻觀良久因以物

畫地記形像及畫畢混元忽以扇指空中流光四散乃騰空而去眾皆側身仰視漸遠漸小沒於雲中遂以事上聞詔編事跡入碑之中又勅於兩京造延唐觀文宗開成二年五月中書舍人高元裕為閬州刺史於州北八九里嘉陵江上小山之前忽見崖壁間光彩有異近而觀之石上自然石文成老君真像眉髮衣章巾履服飾無不周備傍有一人寬衣大袖持簪簪香後一人童子雙髻高束謹若聽命皆非人力圖繪鐫刻所及元裕每有祈禱即紫炁上浮又有靈泉自湧士民請福無不立効遂刻石建宇用旌其瑞乃畫圖呈進乞編入史詔從之武宗會昌元年初以二月十五日大聖祖降誕之日為降聖節仍令兩京及天下諸州府設齋行道作樂賜大酺三日軍期急遽亦不在此限永為常式懿宗咸通十年九月十日徐州逆寇龐勳領從黨三千餘人來亳州太清宮其日宮北百姓三百餘人見老君自宮中乘空而南須臾黑霧遍南川中群賊迷路自相殺戮龐勳溺水而

死群兇自此殄滅汴州節度使太清宮使李蔚具事上聞詔曰我國家系承混元教遂清淨苦縣舊里聖相故鄉宮宇具嚴廟貌斯設昨者餘妖奔突縱火將欲焚燒陰霧覆閉於晴空狂寇顛迷於道路散逸原野逮至誅夷緬惟玄功申茲靈貺內出青詞又委李蔚虔申告謝布示中外仍付史官十三年三月台州刺史姚鵠奏於天台山修老君殿於其地穿獲得石函冊文以進乞付史館頒示四方詔從之廣明二年三月河中節度使王重榮奏據晉州中龍角山慶唐觀老君殿側柏樹上瑞葛枯死重生先是武德中混元應現後於二樹間立殿宇逾年之後柏樹上忽自生葛蔓長十餘丈榮茂於常其後齊王奪嫡此蔓枯死旬月之後自其末青翠再生齊王遂敗至中宗復位安史叛逆朱泚謀亂皆忽枯落久而復生廣明元年黃巢犯關其年秋葛蔓枯死二年春枝葉重茂又於傍樹上別生一枝旬日之中長五十餘尺相對繁茂有異於常奏詔褒美編付史官其後祥異皆有詔

勅蓋美乎葛藟慶其孫謀瓜瓞昭其遠祚混元流既奕葉無窮者也皇帝駐蹕西蜀中和二年八月九日進到帝令宣示内外三年三月十一日亳州刺史潘綱差道士馬含章孫接梧等奏太清宮自乾寧四年已後累有逆寇侵犯真源少或逾千多或至萬皆窺伺是宮欲為焚劫或來攻城邑或旁犯縣城老君皆密垂神化忽起濃雲或驅以陰風或擊以雷電率皆顛沛尋至敗亡靈貺益彰神功罔測尋詔昇真源縣為徽縣仍内出青詞脩崇告謝帝即稽首東拜八月十二日勅亳州太清宮是混元降聖之里名高道祖福隆皇基九宮之瑞井涵空一鹿之仙蹤在樹累代之禎祥可紀近年之感應尤彰所宜嚴盛於福庭安可荒涼於靜宇潘綱能施善政久染真風廣出傳錢備修宮觀垣墉棟楠無不精新像設丹青彌加煥麗觀圖考事深可慰嘉其住宮威儀道士吳重玄可賜紫仍號凝玄先生道士馬含章孫接梧並賜紫潘綱加金紫光祿大夫檢校工部尚書餘並如故其年八

月二十九日夜詔帝房宗室李持立與道士李元爲於成都府青羊肆玄中觀混元降生舊地設醮祈真忽見虹光如彈丸許漸漸明大出於殿基東南竹林中跳躍入西南梅樹下沒於沒處穿地三尺已來得寶塲一口長一尺一寸五分闊七寸四分一邊厚一寸三分並有花文一邊厚一寸八分重一十二斤有古篆六字各方二寸深三分鐫刻瑩潔迨非人工文曰太上平中和災九月一日西川節度使侍中陳敬瑄奏曰皇帝陛下稽古順天膺圖撫運凝懷至道屬想大同是用省方以明罪己深仁旁達於下土至德昇聞於上玄符譏允臻禎祥間出降太上匡持之命清中和寇孽之災迺示明文爰形古篆足表妖氛即殄聖祚无疆克知收復之期便是清寧之日至十二日帝令宣示百官中書侍郎平章事韋昭慶戶部侍郎平章事蕭遘門下侍郎平章事鄭畋御史中丞張濬宗正卿嗣曹王龜年表賀曰伏以荏苒彌聚車駕省方天災流行國家代有陛下降成湯罪己之詔微

王者有任之師顧彼兇妖即當殄滅清平既彰於嘉兆幽贊爰觀其秘文亦雀銜書觀豈同於太上玄龜負卦慶難比於平災況因宗室禱醮之辰仍有祥光跳躍之瑞其爲感現可謂丁寧樞密使李順融十渾十二衛都指揮使田令孜表賀曰今者又有維城來於仙輿至誠纔發嘉兆俄呈現此時在地之赤光是昔日度關之紫氣及穿積土果獲古文驗逸勢於龍蛇即知平於梟獍於冲遠理頗甚昭開既太上今與平災知中和永昌厥祚所現全因聖祖掘得又自皇枝捧此靈蹤可明天意且混元聖祖每逢多難皆有殊祥唯彼明徵備書正史昔於丹鳳門上告田同秀與天寶復國之期今又青羊肆中示李特立以下還宮之慶莫不天下幸甚乞付史館帝並俞之十五日李特立授太子校書李元爲賜紫仍各賜緋帛三百匹二十一日又詔曰太上玄元大帝與弟子文始先生誦真經於樓觀之臺約後會於青羊之肆便乘雲駕俱入流沙仙記傳聞地圖標載自周昭至于此

日曆數約二千餘年景象寂寥基礎牢落今因恩幸靈昭彰殊光跳躍於庭前靈象申明於樹下博舍古色字驗休禎中和之災害欲平厚地之禎符乃現足秉玄穹降祐聖祖垂祥將殲大盜之兵戈未耀中興之事業須傳簡冊彙示寰區已付史官備令編錄仍模勒文字告示諸道及軍前其觀可改號為青羊宮仍置殿堂屋宇側近屬觀田地約有兩頃近來散屬黎甿多植慈蒜清虛之地難使薰蒸已賜錢二百貫便令收贖仍給公驗永歸靖虛宗子特立已除官道士李元為已賜紫所宜升獎用荷慶靈敬壇位冠公台風行郡國効節於延洪之代修心於道德之鄉遂令境內消兵地中呈寶其為林美倍可嘉緡至十月七日初高品郭遵泰監建青羊宮土木之工並用內庫宣賜自獲靈瑞之後至是月癸丑近蜀郡寇相次擒戮旬月之內遂致清平駕幸青羊宮頒賜有差李特立賜緋投龍州錄事參軍又下詔曰太上垂祥青羊應現禮宜崇飾用答殊休諸道州府紫極宮宜

委長史如法修飾仍還有科儀道士祭醮是月乙卯奏收復京城有以見大道垂休聖祖昭祐洪圖延永唐祚無疆者也又勅翰林學士承旨尚書兵部侍郎知制誥樂朋龜撰碑立之伏乞頒示天下以表皇家承神仙之苗裔感太上之靈貺實萬代之無窮也十六臣今檢會從國初已來所造官觀約一千九百餘所度道士計一萬五千餘人其親王貴主及公卿士庶或捨宅捨莊為觀並不在其數則帝王之盛業自古至于我朝莫得而述也中和四年十二月十五日上都太清宮文章應制弘教大師賜紫道士臣杜光庭上進謹記

歷代崇道記

體玄真人顯異錄

木神作祟

惟二

萊陽東南白坡莊有王進之妻董氏患急弓風屢召名醫治之弗效經其半載忽聞有先生號體玄真人到白坡蒼進乘馬引僕請師不允進還與親復議曰若王先生不來救之則董氏之命在於朝夕矣其父子二人再同步詣蒼彌加懇請師乃許遂至坡居視患人曰我將謂何病指雕木佛前神子云誰知此箇火頭作祟令進等燒却良久董氏訝而笑曰妾病若遺也一家欣然拜謝師欲出眾為之曳衣勉留齋畢乃去

毛獸為災

孫富福山縣南塔子莊人也家資稍盛酣醢理生性賦強梁語多侮狎不居禮節里人謂之癡三郎也常從師遊戲山林以鳥歌酒之友寓一日忽患血痢淹延月餘藥食無功疼痛弗忍切切然自訟曰先生胡不來救我邪語未已師從門外呼之曰家中有孫癡三否子欽出而迎曰大人病將極矣師曰不妨欽

欣然引至病榻師高呼癡三我特來與你飲酒何得不起邪富曰我病將死矣水米不加安能飲乎師曰我敢保你不死遂出門四方時令人擊碎後內問富曰起得否答曰痛則止矣奈無力不能起也師令富妻梁氏速烹

饘粥須臾報粥熟矣師即臨釜啣之然後親哺之富乃連食數器揚言甘美無味比諸師復語梁氏有美醢速取一罇師自飲至半餘者與富飲之沉疾頓愈即端衣正履起而拜謝曰深蒙師父慈憫救之復活下情無以慰

念願為弟子出家修行師曰夫出家盡終者皆宿緣所致非偶然而能為也觀汝之宿賦於出家則未然當在家作福可也未幾師潛去之富乃徧檢里人所負財賦契券文曆悉焚之矣

無食過東

師昔遊東陽東倪家莊河東名曰呼石崖有新砌小庵一所門人王志堅等居之時方饑遇新正志堅私議於東曰此庵初立信奉者

幾家耳賴師真降臨即罄其所有作上元醮可乎眾曰諾經之管之醮乃成焉至十六日告畢師語眾曰諸出家在家不可散去明日齋畢則散眾於是無敢辭者良久志堅入覆云弟子數訖眾人已七十有餘據所剩餅物

不滿拷拷恐難及之師躬詣其處將拷拷中物注在一空匱內出曰及得及得次日臨齋志堅復稟各幾枚曰四枚依之齋畢師曰據遠來者更各與二枚以充路費散過並無一少剩者也志堅悉告於眾眾乃焚香再拜讚言奇異從此化數十莊奉善

生麵充齋

師昔乞食嘗到東牟溝頭村其子深見師問之曰先生將齋乎師曰然即請坐內語其妻曰當造饘與先生齋方凌麵成劑忽有人從門外請師曰今李官人命友洪欽待先生久矣師聞之語深曰將麵來答曰未熟師曰但取來不妨深意謂持去就李宅熟之遂進生劑師乃接而食之稍無難色深駭然而諫曰然先生鼎有丹砂鑪存真火亦詎能當之

哉師微哂不答食盡乃去後略不傷和

所祈即應

師應緣北邁到薊州遵化縣時北京大旱按察使久佩師旨訓名導道及屢嘗禱師有應是時復知在於遵化即還差在京奉道商四官人齋書邀請師聞之不能辭避應命而往於七月十四日到北京使與諸官及應係乞雨數千人恭拜畢使親為祇待翌日清旦使復率眾師前焚香致禱曰此方旱及五旬苗將槁矣願垂慈造俯慰群情幸甚幸甚師曰用得一尺水否眾相顧而無言十七日果雨地方千里皆及一尺官民僉議作謝雨醮復罷師將離京傾城相餞使曰此別之後再會未可期也師即云都下使歸而思付到任未及兩月何有都下之期師於中秋后都城太虛觀不數日使任太子詹事果會於此師欲南還詹事贈別云無計久駐芝嶺山水漸遙後會又何處也師曰寧海詹事默然詳度或不測有寧海往復之幹若任於彼則何其降邪後果任寧海

凡會先知

師還鄉繼北邊有事。唐事被差。到彼不功。遂謫為寧海守。燒赴任。乃躬詣聖水。念師焚香致懇曰。導道若於往昔。神仙達士。但聞其名耳。自拜師之後。凡伸祈禱。必垂嘉應。將成會遇。示以預知。深愧塵凡。承茲大幸。幾欲去蠅蠅之累。從雲水之遊。奈事與願違。徒加悵然也。

出神飲酒

師被召過滄州。有呈親四官人。請向自己道。菴內駐止。翌日。輒有酒使劉公。請師曰。敢屈法身。暫臨弊止。萬幸。師從之。詣彼廨宇。以至於齋。畢復啓曰。久知先生飲酒不醉。恨無緣見之。今道德聞上。幸獲參承。敢祈暢飲。一醉願之。足矣。師曰。過蒙厚意。公之美醞。想非村醪之可比也。緣食之太飽。必不能任。略容少憩。當成大飲。公諾而退。徐聞之。師在廳上。鼻息如雷。公乃同妻趙氏。欲入酒庫。以備師之所飲。忽見師在庫中。凭几操瓢連飲之。二人潛身退步。復觀廳上。見師依前熟寐。再窺庫

中。見師正飲一瓮。既盡。次瓮又將盡。夫夫婦婦驚訝惶恐。走至廳上。不待香而拜之。師覺曰。荷公見召。已飲訖。二瓮。予何以酬之。遂令侍者取一舊汗衫。贈公云。物雖輕。而價復高矣。凡人有疾。覆之可愈。師尋赴關。四方有病者。聞之。來如輻湊。効如谷響。彼夫婦當然。猛省曰。信哉善緣。可結道力。堪憑。遂將財寶散之。貧乏奴僕。放以從良。二人分頭出家。俱在道而終焉。

忘形棄恭

師昔於福山縣南水都村。乞食有富者王祐。見之曰。先生肯共我棄恭否。師曰。依高命。時方暮冬。極寒。祐乃狐帽。錦裘。皮靴。毳毼。見師單衣露肘。弊鞋。出指故謔之。引於前廳。命師當門迎風而坐。祐即坐其傍。復戲曰。當圍幾局。師曰。三局可矣。祐曰。太少。師曰。十局可否。祐允之。次第而下。局未及終。祐已覺寒。勉至於再局。祐為之呵手。振足。將不可忍。視於師。則乃見神容悅澤。煦煦然如春也。祐竟不能待之。於三乃釋局而起。復曰。先生實為無心。

無念忘形忘體者也。師微笑而嘆曰。俗謔俗謔。遠盟負約。言訖乃去。

專知嗣續

初。專知即福山石塚人也。世本豪族。稔飲師望。年將耳順。嗣續未焉。忽一日。師於庭前地坐。以足舉碓。曰。人問其故。師曰。專知無嗣。蓋此曰置之不當也。我今送二子與之。當移此曰。免為後患。眾皆笑。以為狂言。師乃儼然不顧。足舉曰。移舞袖而出。後果生二子。長曰興。住次曰乞。得眾方純信。

抱陽身安

高榮與初氏同里。世為醫藥。宿稟仁慈。又崇師道。訓名抱陽。一日。忽患痢疾。仙方神藥弗之能治。迨將月餘。湯飲不下。疼痛莫禁。咸云休息無法。可痊。復一日。師從東牟至里南樓子莊。語其徒鄧道通曰。我將謂高抱陽病已死矣。今知存在。同往救之。北過陽主神廟。遂折荆枝一莖。望廟擣片。竝立久之。徑往高氏本居。索小刀一刃。入病室。見病者曰。我來救汝。遂以布袍袖從頭拂拭。以至於踵。復以刀

失力刺牀席叱病者起坐即應聲而起疼痛若遺語言如故令家人急煮稠粥家人曰水尚難飲而況稠粥乎師曰不妨少頃粥至師親授病者病者始則意難及乎少進即連食二器唱言美哉即離席起謝安健勝常

雨龍忽起

師在薊州作醮畢有玉田縣官員及諸奉道請至本邑玉清觀住夏繼五月旱作初十日官民禱師祈雨允之翌日雨降約二寸復不遠官民心未愜而面謝之師曰衆謝之非也豈是貧子所禱之雨至十三日侵晨師於聖前焚香畢指示衆曰見否衆隨指南望見黑煙一縷從井而昇師曰此是雨龍取水已起不久當澍果於辰時雨降抵暮方息遠近霑足遂使官民慶悅苗稼滋榮成一方之大稔

烹雞復還

師昔年嘗至萊陽東馬曹莊有姜仇者頗開師能療疾病敵寒暑恨不得而見之是日請至本居啓曰仇願奉先生飽齋當造何物可邪師曰有雞否答曰仇家每畜雞羊至於雞

則未嘗畜也適有親者遺一雞稱能鳴留之司晨耳師曰肯與我食乎仇諾而出捕之適有本莊李壽卿見之諒於仇曰夫世之君子猶不忍見死不忍食肉況爲道者乎詳公之敬其先生者近於謬也仇曰嘗聞人設饋置酒不能致先生一到門者在在有之今幸不我外豈可怯此物邪遂殺而烹之既熟饋於師乃食之俱盡捫腹作噫然然而去翌旦仇等忽聞雞鳴衆疑曰復有何雞來此衆邪聲與所烹者相類及明視之形色亦與前雞一同驗其昨日所得翎羽復一一存之仇乃心情無託顛倒若醉往告壽卿壽卿聞之乃懼然曰昨視之先生以爲常倫今詳是理當爲得道者乎仇曰雖云聞說先生療疾病敵寒暑心未至於純信也復未審得道者悉能爲於是乎壽卿曰惜公之不知書也僕稍曾涉獵仙經道傳知夫得道者可以陶冶二儀埏埴九土出神入夢透金貫石變化飛騰無所不至況此一雞者乎仇省而賀曰先生之道乃天也予乃醜雞也公爲我啓其覆方知天

之高矣遠矣豈容淺淺之見測其涯涘者哉

王公落馬

福山南水都村王忠一日請師本家共飲將至半酣輒有南莊客戶李旺喚忠詣彼分田忠令轡馬徐報轍訖其妻復催之師語忠曰勿去去則可惜死却爾其妻作慍而言曰先生戀飲不顧妨人之幹安用復以卒亡之事特相誑邪師拂袖而起曰不信則從汝北行將至五里忽聞後有人走馬追及視之乃伊塔柳春也愴惶而告曰妻父落馬死矣禱先生往救之拜不自休師許同迴至彼見忠死卧於道衆圍而哭之師止以勿哭令取水一椀環而灑之三市水盡師曰不能救得衆再三哀告師復令取水一椀布氣念呪以水噴灑又至於三市師叱曰王忠爾撞左手即應聲而舉右手亦然復令開眼見衆云爾等何爲其妻問曰不覺邪徐答云只記得到此忽然迷悶隨數人西去約行及二十里慕聞王先生追喚迴來復至一溝既深且闊不能過得賴王先生以手提之乃過耳衆指云先生

在此忠乃起而禮謝曰不信玄言遂招此厄
儻非救拔已為鬼錄矣其妻大恥彌加敬服

李婦食狗

師到濟南府臨邑縣有在城焦潤王李過風
等十上戶修黃錄大醮分諸局次晝夜營備
每日四方善衆來如雲集將作醮之日侵晨
有數醮首詣靜位伺之師乃覺衆託侍者獲
云有在城李家新婦於殿前卒死願慈救
之師曰何不早遣乃頭不及簪披衣踉蹌至
於成生人元辰前取氣一口吹於死者頂門
中仍以袖拂之其人即蘇師迴靜位衆禮謝
畢師曰此人為食狗肉觸犯醮筵元辰謹責
正追付東嶽我與救迴良久其人方省告於
衆曰為我不信王大師故食狗肉來此看有
何驗今被譴至黑暗中賴真人光明救迴衆
不可不信也

痼疾獲痊

師在北京華陽觀有按察副使嘉議大夫素
以刑政酷虐世號為羊戢劔事親頗孝因母
染患數載千方弗驗每於公退輒承顏問疾

恨無計而代之有吏報云邇在京凡有病者
告王大師餘食食之立愈使聞之未及純信
然孝誠所使不可不為也遂往拜師乞餘食
師乃授之迴饋於母食之沉疾陡痊翌日請
師本廳朝服設拜捻香跪啓曰僕之好善始
於幼歲自及第為官恐妨王事固不宜使人
知也比年屢任斯職至於關西山東河南海
北靡不遍經嘗訪以釋門據所親見皆泛泛
之徒無可師者今幸遇真人乞垂法訓永奉
宗師結出世之因緣也師訓名清質號開真
子稽首拜謝畢禱供茶果留連抵暮送師還
觀

冤魂乞救

翌日副使烏林答清質糾集京城善衆議修
黃錄醮衆欣然而諾遂就華陽觀夙夜營備
泊附醮之家各搭蓋靈位向畢叩醮三二日
忽於靈位前有一人暴死復起行走張荒赴
一婦人意欲杜撰似有所訴之事衆為之隔
住著言門難乃曰羞恥難言衆曰爾若不言
人何以知徐曰我於年前都下當報事滿九

月九日迴到本家被妻於廩內藏毒將我謀
殺嫁其所往之人今知南方得道真人在此
作大醮我欲杜撰告真人乞垂救拔我並無
親族又無知者百無倚託恐墮幽冥何時得
免若真人一去不得遇也言訖放聲痛哭觀
者愴然輒有隨師瑞州海陽縣奉道張二官
人緩止其哭語云爾既如斯明白已開具在
醮也此間醮罷我即請真人於海陽作醮再
與爾追薦即應謝而去其人復還如舊

精邪去宅

師到平州昌黎縣高真觀在城有前縣尉賦
性剛劣素不信善忽淹重疾俯仰踰年夜夢
顛倒心常驚悸親戚奴僕似此者衆復有鬼
怪相撓以妨飲食遂成羸弱不復起也以至
巫羞醫倦弗獲痊瘥聞師在觀令人提詣師
前師叱去扶人乃疑而未捨再怒叱方捨而
退病者悉能獨立師令近前又能行步似瘳
半矣師以自食餘物授之亦乃食盡良久輕
健若無病之時也師為呪水一瓶書符一道
教其用度禮謝而歸依命貼符於

鬼怪現形至甚醜惡家人皆見用水灑之乃驚走入一坑中復於坑中灑之遂逼出大小六鬼擔抱提挈而去再赴而灑之離宅漸遠以至形影消滅矣從此宅靜人安翌日挈家詣師焚香拜謝曰一生性僻剛劣不仁豈知道門有如此奇事邪遂大施錢財修建高真觀化在城二百餘家尊崇道教

鸞鶴集壇

瑞州海陽縣奉道張二官人請師至彼獨修下元黃籙大醮其中破用非止一端但忻然營備略無倦怠師預示衆曰此醮非常必垂嘉兆十三日申時發牒之次有鸞四隻鶴二十隻翔於空中良久西南而去十四日中朝行道師曰有報應日中則天師降現徐行道至午忽見雙鸞引群鶴翔於壇上及以五色彩霞光射衆目有人不信是鶴者數隻爲之低飛回翔側示朱頂衆皆異之遂巡一鶴翩翻而落於壇前驅之即狎每日以食飼之但仰天而唳終不飛去待師於二十日將起程西邁焚香辭聖畢鸞乃迎師大唳數聲振羽

而翥空中盤繞三市望西南而去矣即有滿城信士賀郎中等寫爲圖而披之不已

太上雲端

師自北方迴至德州重興鎮有前滄州節使光祿修黃籙大醮四晝夜乃潔已虔心依式咸備將行醮事師曰夫官高三品亦人間之極貴也復欽奉玄科懇懇不息乃感諸天惟樂當有非常之兆至第四日夜設醮之際衆忽見

太上老君乘五色明霞見於壇上方奏青詞師乃俯伏衆又見一童子僅及尺餘容貌奇絕衣服特異從師手鑪內起詣太上前如有稟覆之事焚詞畢方隱不復見矣光祿即令畫工寫其事跡衆各傳寫之凡所見聞皆歎古今罕遇也

體玄真人顯異錄

江淮異人錄

惟三

司馬郊

司馬郊一名凝正一名守中遊於江表常被冠褐躡屐而行日可千百里衣褐不改作而常新所爲羸暴人無敢近之者能詐死以至青腫臭腐俄而復活嘗止於宣州開元觀自宣之歛時道士紹修默亦往歛州至城門遇之與同行修默避之先往至一鎮戍方息於逆旅郊續至修默隱身潛窺之見郊入別店中召主人與飲因而凌辱之主人初亦敬謝郊不爲已而更擊之既而互相搏擊郊忽踣於地視之已死體冷色變一市皆聚觀乃召集鄉里縛其主人於屍責詞將送於州時已向夕欲明旦乃行至中夜復聞店中喧然曰已失司馬尊師矣而人方悟郊詐死釋其主人修默明日侵曉乃行至前百里許問人曰司馬尊師何時過此曰今早已過矣明日復行百里問之曰昨日已早過矣及到歛州問之亦然每往來上江諸州至一旅舍安泊久之將去告其主曰我所有竹器不能將行取

火發之主人曰方風高且竹屋低隘不可舉火郊不已衆人共拜勸之郊怒不聽乃發火於室中持一大杖立於門側敢至者擊之郊有力人無敢近之者俄而火盛焰出於竹瓦之際人皆惶駭既而火滅郊所有器什皆盡所卧牀皆重灼而薦席無有焦者有朱翹者爲池州法祿郊過詣之謂朱曰君色甚惡當病我即去君病中能念我或呼我姓名當有所應翹不之信後十餘日果病熱痰數日甚劇忽憶郊之言意其神之因稽首思念求祐初朱已病惡見人在已前有小吏陳某者常指使如意令人室侍疾亦叱去之家人守之戶外無得入者至是朱恍惚見陳某持一甌藥進之朱飲之便覺瘳瘳體佳呼家人曰適陳某所持藥甚初當令更進一服家人驚曰比不令人入室陳安得至此朱乃悟郊之垂祐也自是朱疾漸平郊嘗居歙州某觀病痼困劇觀主欲申白官司先以意聞郊郊怒曰吾疾方愈何勞若此既漸困篤觀主不得已乃口白縣令姚蘊蘊使人候問之郊曰姚

長官何故知吾病也來者以告郊怒忽起結束徑入某山中其行如飛後十餘日持一大杖求觀主將撫之觀中道士共禮拜求救乃免嘗至洪州市中探鮮食之市中小兒呼曰道士喫鮮郊怒以物擊小兒中流血巡人執郊送於虞候素知其名方善勸說之郊乃極口罵怒虞候不勝其忿杖之至十郊謂人曰彼杖我十五可得十五日活杖我十十而死矣既而果然復入廬山居簡寂觀因醉卧數日而卒臨終令置一杖於棺中及葬覺棺空發之唯杖在焉。

錢處士

錢處士天祐末遊於江淮嘗止於金陵楊某家初吳朝以金陵爲州築城西拋江東至潮溝錢指城西里餘荒穢之地勸楊買之楊從其言及建爲都邑而楊氏所買地正在繁會之處乃構層樓爲酒肆焉嘗宿於楊家中夜忽起謂人曰地下兵馬喧闐云接令公晤我不得眠人皆莫之測也明日義祖自京口至金陵時人無有預知者嘗見一人謂之曰爾

天罰將及可急告謝自責人曰我未省有過錢曰爾深思之人良久乃曰昨日飲食不如意因怒其下棄食於溝中錢曰正是此爾可急取所棄食之乃取之將以水汰去其穢俄而雷電大震錢曰急取穢食之如言而雷電果息嘗有人圖錢之狀錢見之曰吾反不若此常對聖人也人不之悟後有僧取其圖置於誌公塔中人以爲應後烈祖復取之入宮陳於內寢焉又每爲譏語說方來事言李氏之祚曰髣髴之間一倍楊初吳氏有江之地凡四十六年而李氏三十九年或謂楊氏自稱尊至禪代二十年故髣髴倍之耳。

聶師道

聶師道歙人少好道唐末于濤爲歙州刺史其兄方外爲道士居於郡南山中師道往事之濤時往詣方外至於郡政咸以諮之乃名其山爲問政山吳朝以師道嘗居是山因號爲問政先生焉初方外在山中郡人少信奉者及師道至晚信日至而富實師道嘗與友人同行至一逆旅友病熱疾村中無復醫藥

或教病者曰能食少不潔可以解及病危因復勸之人有難色師道諭之曰事急矣何難於此吾為汝先嘗之乃取嚼之人感其意乃食而病果愈後給事中裴樞為欽州當唐祚之季詔令不通宣州田頌池州陶雅舉兵圍之累月欽人頗破之後食盡援絕議以城降而城中殺外軍已多無敢將命出者師道乃自請行樞曰君乃道士豈可遊兵革中耶請易服以往師道曰吾已受道法科教不容易服乃縋之出城二將初亦甚怪及與之語乃大喜曰真道士也誓約已定復遣還城中及期樞適有未盡復欲延期更令師道出諭之人謂其二三咸為危之師道亦無難色及復見二將皆曰無不可唯給事命時城中人獲全師道之力也吳太祖聞其名召至廣陵建紫極宮以居之一夜有羣盜入其所止至於什器皆盡取之師道謂之曰汝為盜取吾財以救飢寒也持此將安用之乃引於曲室盡取金帛與之仍謂之曰爾當從其處出無巡人可以不無患盜如所教竟以不敗後吳朝遣

師道至龍虎山設醮道過羣盜劫之將加害其中一人熟視師道謂同黨曰勿犯先生今盡以所得還之羣盜亦皆從其言因謂師道曰其即昔年揚州紫極宮中為盜者感先生至仁之心今以奉報後卒于廣陵時方遣使於湖湘使還至某處見師道問之曰何以至此師道曰朝廷遣我醮南嶽使者以為然及入吳境方知師道卒矣師道姪孫紹元少入道風貌和雅善屬文年二十餘卒初紹元既病劇有四鶴集於紹元所處屋上及其卒人見五鶴冲天而去

于大

于大居洪州西山中無四時常持花不欲近人嘗至應聖宮以花置道像前道士為設茶置之食案須人退于及取飲飲訖置茶盞於案長揖而去人或揖之亦復相揖但不與人語耳有少年好道欲往事之而不能得一日少年拜曰願事先生于走不顧少年逐之而持其衣于驅之不去上山凌水不暫置之至一處臨水而坐問少年曰願渴否曰然懷中

出物如茶末與之曰置此口中掬水下之如言須臾因睡及覺失之矣

李夢符

李夢符者常遊洪州市井中年可二十餘短小而潔白美秀如玉人以放蕩自恣四時常挿花徧塵城中酒肆高歌大醉好事者多召之與飲或令為歌詞應聲為之初不經心而各有意趣鍾傳之鎮洪州也以其狂妄惑眾將罪之夢符於獄中獻詩十餘首其略曰挿花飲酒無妨事樵唱漁歌不礙時鍾竟亦不罪後桂州刺史李瓊遣使至洪州言夢符乃其弟也請遣之鍾今求於市中旅舍人曰昨夢符不歸因爾不知所終

劉同圭

劉同圭者居洪州詣艾氏家賃其屋而居家唯翁媼而已旦持一筐草實之夕而醉歸積久隣人怪之夜穴壁窺之見出一缶土以水噉之須臾草生及曉刈之後翁病謂媼曰我死必置一杖於棺中及卒如其言初舉棺以出人覺其重及至半路漸輕如無流蕩其棺